



160 150 140 130 120 110 100 90 80 70 60 50 40 30 20 10

8 9





莊子膚齋口義卷之四




莊子外篇胠篋第十

膚

齋

林

希逸



將爲胠篋探囊發匱之盜而爲守備則必攝緘縢固扃鐫此世俗之所謂知也然而巨盜至則負匱揚篋擔囊而趨唯恐緘縢扃鐫之不固也然則向之所謂知者不乃爲大盜積者也故嘗試論之世俗所謂知者有不爲大盜積者乎所謂聖者有不爲大盜積者乎所謂聖者有不爲大盜守者乎何以知其然耶昔者齊國隣邑相望雞狗之音相聞

罔罟之所布桑穀之所刺方二千餘里闔四境之內所以立宗廟社稷治邑屋州間卿曲者曷嘗不法聖人哉然而田成子一旦殺齊君而盜其國所盜者豈獨其國耶并與其聖知之法而盜之故田成子有乎盜賊之名而身處堯舜之安小國不敢非大國不敢誅十二世有齊國則是不乃竊齊國并與其聖知之法以守其盜賊之身乎

看此篇便見得憤悱之雄處粧撰一段譬喻自爲奇特胠開也探手取之也撥亦開也鼠竊之盜郊下此六字非文乎緘縢繩結也攝纏繞也

扁管鑰也鑄鎖也世俗之知本爲鼠竊之備大盜至則併挈而去矣田氏篡齊以私量貸公量入看左傳所言便是借聖人之法以濟其盜賊之謀戰國之時大抵如此故莊子以此喻之嘗試論之世俗之所謂至知者有不爲大盜種者乎所謂至聖者有不爲大盜守者乎何以知其然耶昔者竈逢斬比干剖萇弘膾子胥縲故囚予之賢而身不免乎戮故跖之後問於跖曰盜亦有道乎跖曰何適而無有道耶夫妄意室中之藏聖也入先勇也出後義也知所杳知也分均仁也五者

不備而能成大盜者天下未之有也由是觀之善人不得聖人之道不立跖不得聖人之道不行天下之善人少而不善人多則聖人之利天下也少而害天下也多

脰裂也靡爛也皆得罪而喪其軀也四子雖賢而身皆得罪盜跖反以自免此言賢者不足自恃而竊聖道之名者或以自利爲盜之聖勇義知仁此是莊子撰出這般名字以譏侮儒者其言雖怪而以世故觀之實有此理說到不善人多善人少利天下少而害天下多處亦是精絕

故曰唇竭則齒寒魯酒薄而那鄆圍聖人生而大盜起掩擊聖人縱舍盜賊而大下始治矣夫川竭而谷虛丘夷而淵實聖人已死則大盜不起天下平而無敵矣聖人不死大盜不止雖重聖人而治天下則是重利益跖也

楚方代魯以其酒薄也而梁乃代趙以魯不得而援也唇與齒似不相關唇竭而齒自寒川與谷不相干川竭而谷自虛丘與淵不相干丘夷而淵自實即今人所謂張公喫酒李公醉也以喻聖人之法不爲盜設而反爲盜賊之資故曰

聖人生而大盜起聖人不生而大盜不起掩擊  
聖人縱舍盜賊言亦無聖人亦無盜賊而後天  
下治也川水滿則山谷之中皆有水川竭則谷  
自虛矣川與谷雖不相通而春夏之盈秋冬之  
涸却同也丘夷山頽而夷平也猶曰山附於地  
剥也山夷則土實之於淵是不相關而相因也  
無故即無事也重聖人而治言聖人復出也聖  
人復出而制法愈密欺詐者得之益可以欺世  
故曰重利益賊也魯酒薄而郁鄆圍又見淮南  
子其文稍異意亦同

爲之斗斛以量之則并與斗斛而竊之爲之權衡  
以称之則并與權衡而竊之爲之符璽以信之則  
并與符璽而竊之爲之仁義以矯之則并與仁義  
而竊之何以知其然耶彼竊鈎者誅竊國者爲諸  
侯諸侯之門而仁義存焉則是非竊仁義聖知耶  
斗斛權衡符璽仁義四者并言以下抑高之意  
竊鈎小盜也鈎腰帶環也戰國之諸侯篡奪而  
得皆大盜也小者誅而大者乃如此憤世之言  
也既爲諸侯則其立國亦以愛民利物爲事是  
亦不特竊國併竊聖人之仁義聖知也

故逐於大盜。揭諸侯。竊仁義。并斗斛。權衡。符璽之利者。雖有軒冕之賞。弗能勸。斧鉞之威。弗能禁。此重利益跖。而使不可禁者。是乃聖人之過也。故曰。魚不可脫於淵。國之利器不可以示人。彼聖人者。天下之利器也。非所以明天下也。

名爲大盜者。人皆欲逐之。今之諸侯皆竊國者。立於人上。人謂誰不見。故曰。揭如此。六盜昭昭。於世併仁義。斗斛權衡。符璽以竊之。而世未有立賞以求捕用刑以禁止者。是皆憤世而爲此言。魚不可脫於淵。言不可離水也。聖人之法。只

可自用。不可使人人皆知之。故曰。非所以明天下也。明者天下皆知之也。

故絕聖棄智。大盜乃止。擿玉毀珠。小盜不起。焚符破璽。而民朴鄙。掊斗折衡。而民不爭。殫天下之聖法。而民始可與論議。

摘玉毀珠。焚符破璽。剖斗折衡。皆是激說以結絕聖棄智之意。非實論也。殫殘者。毀削也。盡去聖人之法。民始純一。可與言道也。故曰。民始可與論議。此皆憤世之辭。故人每以剖斗折衡。焚符破璽之事譏議之。其實即老子不貴難得之。

貨則民不爲盜之意但說得過當耳東坡曰人  
生識字憂患始豈欲天下人全不識字耶  
擢亂六律鑠絕竽瑟塞瞽曠之耳而天下始人含  
其聰矣滅文章散五采膠離朱之目而天下始人  
含其明矣毀絕鈞繩而棄規矩攏工僕之指而天  
下始人有其巧矣故曰大巧若拙削曾史之行銷  
楊墨之口攘棄仁義而天下之德始玄同矣彼人  
含其明則天下不鑠矣人含其聰則天下不累矣  
人含其智則天下不惑矣人含其德則天下不僻  
矣彼曾史楊墨師曠工僕離朱者皆外立其德而

以爚亂天下者也法之所無用也

擢亂者抽擢而舉亂也六律有長短之數抽而  
亂之使其不可用也鑠絕焚棄之也有瞽曠之  
耳而後能爲律樂之事塞其耳則人之聽皆合  
乎自然無此等造作也明巧兩句其意亦因因  
巧字却舉老子大巧若拙一語以證之是文法  
處曾史有忠孝之名楊墨有仁義之言攘除而  
棄擲之使仁義之說不行則天下之人同得此  
德始歸於亥妙矣不鑠不消散也不累然係累  
也不惑不相誑惑也不僻無偏陥也以曾史楊

墨與師曠工倕離朱弁言乎以小抑大也外立其德者重外物而失本心也爚亂者言熏灼而撓亂之也以正法言之此等人皆無所用言皆當去也故曰法之所無用也此一句結得極有力文字之妙處

子獨不知至德之世乎昔者容成氏大庭氏伯皇氏中央氏栗陸氏驪畜氏軒轅氏赫胥氏尊盧氏祝融氏伏羲氏神農氏

十二介氏只軒轅伏羲神農見於經自此以上吾書中無之或得於上古之傳或出於莊子自

撰亦未可知亦猶佛言我於過去某劫也雖若大言然以天地間觀之自伏羲以來載籍所可考者三千餘年豈有許大天地方爲三千餘年伏羲以前必有六籍所不傳者但言之則近怪妄然亦不可不知但如吾閩自無諸以來方見於漢至唐而後漸有文物無諸之前當猶草昧可也近時囊山寺前耕於野者忽得一穴其間金玉之器鼎彝之屬甚多人皆竊而去之最後旣虛鄉人皆相率而就觀其壠無大小皆雕人物童虎不勝精巧此前究也其後一壁以鋤斧

擊之鏗然有聲但堅固不可動必是銅鐵所灌意非有國者之墳不然書籍所載閩之上無聞焉則必有之而不傳者然則容成六庭之類不可謂無之

當是時也民結繩而用之甘其食美其服樂其俗安其居鄰國相望鷄狗之音相聞民至老死而不相往來若此之時則至治已今遂至使民延頸舉踵曰某所有賢者贏糧而趣之則內棄其親而外去其主之事足跡接乎諸侯之境車輶結乎千里之外則是上好智之過也上誠好智而無道則天

下大亂矣何以知其然耶

丱食而下又是山無蹊隧處抽繹出來某所有賢者贏糧而趨之便是暗說孟子荀子推而上之孔子亦在其間矣觀齊稷下與蘇張之後便見莊子因當時之風俗故有此論好智則非自然之道矣故曰好智而無道

夫弓弩畢弋機變之智多則鳥亂於上矣釣鉗罟罟罥笱之智多則魚亂於水矣削格羅落置罘之智多則獸亂於澤矣智詐漸毒頡滑堅白解垢同異之穢多則俗惑於辨矣故天下每有大亂非在

於好智

畢有柄之網也弋繳射也機變々許也削格猶漢書曰儲胥也猶今之木柵也捕兔鹿者亦有之置罘亦網也智詐以智而相詐也漸毒相漸深而爲毒亂也頡桀頡也滑汨亂也解姤脯角也堅白解姤異同皆當時辨者之名以取魚取鳥取獸之事與辨者并言之亦是以曾史與斛權衡并譏之意每弋常弋也常弋如此而至於大亂皆好智之罪也

故天下皆知求其所不知而莫知求其所已知者

皆知非其所不善而莫知非其所已善者是以大亂

知與智同

不知者務外求異者也已知者曉然而易見者也自然之理也不善在人者也已善在我者也即齊物所謂是其所是而非其所非言但知他人之非而不知已之所是者亦非也

故上悖日月之明下燦山川之精中隳四時之施喘吳之虫宵翹之物莫不失其性甚矣夫好智之亂天下也自三代以下者是已舍夫種弋之民而悅夫役弋之僕釋夫恬惔無爲而悅夫嘵嘵之意

荴々已亂天下矣

上而日月下而山川中而寒暑四時微而至於  
喘與肖翹之物皆失其自然之理故曰莫不失  
其性甚矣夫好智之亂天下也此嘆息一句而  
結之也喘與微息而動之物附地者也蜩蛩之  
類肖小也翹輕也飛物也蜂蝶之類肖音蕭種  
種穀實之貌役々務外作爲之貌荴々囁々也  
上句既結了却以三代實之謂三代以下便是  
如此故曰自三代以下是已荴々役々兩句對  
說下面只拈荴々字結便與前篇素朴而民性  
軸也

莊子外篇在宥第十一

聞在宥天下。不聞治天下也。在之也者。恐天下之  
滛其性也。宥之也者。恐天下之遷其德也。天下不  
滛其性。不遷其德。有治天下者哉。昔堯之治天下  
也。使天下欣<sup>欣</sup>焉。人樂其性。是不恬也。桀之治天  
下也。使天下瘁<sup>瘁</sup>焉。人苦其性。是不愉也。夫不恬  
不愉。非德也。非德也。而可長久者。天下無之。

聞在宥天下。不聞治天下也。此篇又做一句破  
題。又是一體。在者優游自在之意。滛亂也。靜定  
則不滛矣。宥者寬容自得之意。遷爲外物所遷。

移也使天下之人性皆不亂德皆不移於外物  
又何用治之乎不恬不靜也不愉不樂也以堯  
對桀言之曾史盜跖之類也全書意勢皆如此  
其理皆未正然筆力豈易及哉以不恬此不愉  
便無輕重矣

人大喜耶毗於陽大怒耶毗於陰陰陽并毗四時  
不至寒暑之和不成其反傷人之形乎使人喜怒  
失位居處無常思慮不自得中道不成章於是乎  
天下始喬詰卓鷙而後有盜跖曾史之行故舉天  
下以賞其善者不足舉天下以罰其惡者不給故

天下之大不足以賞罰自三代以下者凶亡焉終  
以賞罰爲事彼何暇安其性命之情哉

喜屬陽怒屬陰毗益也醫書所謂有餘之病也  
致中和則天地位失其中和則有四時不至寒  
暑不和之事氣序既逆則人亦病矣使人者言  
因堯桀在上致人如此也喜怒失位居處無常  
謂妄爲妄動也憧憧往來明從僕思是思慮不  
自得也成章有修理也不成章則失中道矣堯  
好高而過當也詰議論相詰責也卓孤立也鷙  
猛厲也此四字皆形容不和之意盜跖曾史只

是替換賢不肖字用心既不和則賢不肖皆非矣爲天下者於其賢者而賞之於其不肖者而罰之賢非真賢出於好僞舉世皆然故欲賞而不足不給亦不足也言世間此等人多矣其意皆是譏實者乃與爲惡者對說所以重抑賢者也人乚皆慕賞避罰以僞相去則豈能安其性情自然之理哉

而且說明邪是淫於色也說聰邪是淫於聲也說仁邪是亂於德也說義邪是悖於理也說禮邪是相於技也說樂邪是相於淫也說聖邪是相於藝

也說智邪是相於痴也天下將安其性命之情之八者存可也亡可也天下將不安其性命之情之八者乃始鬻卷愴囊レタケルト而亂天下也而天下乃始尊之惜之甚矣天下之惑也豈直過也而去之耶乃齊戒以言之跪坐以進之鼓歌以儻之吾若是何哉

爲明而好五色爲聰而好五聲皆亂其真矣故曰淫德與理自然者仁與義有心以爲之故以爲亂於德而悖於理技能也淫樂也彼以禮樂爲外物故曰相於技相於淫相助也助益之而

愈甚也。藝業也。疵病也。業乃自勞病乃自苦。以聖智之名而悅之則愈勞愈苦矣。故曰相於業相於疵。此聖字止近似能字猶今言草聖之聖也。故於盜亦曰妄意室中之藏聖也。此皆字義不同處。讀者當自分別不可與語。孟中字義相紊亂。八者明聰仁義禮樂聖智也。安其自然則八者雖有亦不能爲累。故曰存可也亡可也。不安其自然則八者能爲害矣。巒巒局束之貌。儉寢。多事之貌。豈直過也。而去之言不特獵涉一過隨即休止。齊戒以言謂鄭重而誇說之跪坐。

以進謂致恭盡禮而相傳授鼓歌以儻之謂言之不足手舞足蹈也。此皆譏一時之學者。吾若是何哉。言汝輩如此果何爲哉。吾非自言指他人而言也。猶詩曰我姑酌彼金鑾。婦称其夫也。書曰我用沉酬于酒。微子称紂也。此是文法。故君子不得已而監蒞天下。莫若無爲。無爲也。而後安其性命之情。故貴以身於爲天下。則可以托天下。愛以身於爲天下。則可以寄天下。故君子苟能無解其五臟。無擢其聰明。尸居而龍見。淵默而雷聲。神動而天隨。從容無爲。而萬物炊累焉。吾又

何暇治天下哉

此段直說無爲自然之治不得已三字便有有  
天下而不與之意以其身之可貴猶貴於爲天  
下而後可以天下托之以其身之可愛猶愛於  
爲天下而後可以天下寄之此兩句文亦奇理  
亦正讀莊子之書於此等句又當子細玩味禮  
記曰筋骸之束解其五臟便是不束矣擢抽也  
過用其聰明也尸居者其居如尸然即曲禮所  
謂坐如尸也龍文采也尸居無爲而威儀可則  
自然有文故曰尸居而龍見淵深也靜也默不

言也雷聲感動人也雖不言而德動人也禪家  
所謂是雖不言其聲如雷也故曰淵默而雷聲  
神精神也天之理也動容周旋無非天理故曰  
神動而天隨如此三句亦可以莊子爲異端之  
書乎理到而文又奇所以度越諸子炊累即是  
野馬塵埃生物以息相吹之意炊動也累微細  
而累多也虛室之中漏日如郊處看日影中微  
塵便見此兩字下得奇特若動而又不動若多  
而不見其多故曰炊累言我若無爲於上而天  
下之人日出而作日入而息自得自樂如萬物

之煥然又何用我容心以治之

崔瞿問於老聃曰不治天下安藏人心老聃曰汝  
慎無攖人心人心排下而進上々下囚殺綽約柔  
乎剛彊廉剗彫琢其熱焦火其寒凝水其疾俛仰  
之間而再撫四海之外其居也淵而靜其動也縣  
而天僨驕而不可係者其唯人心乎

此一段把孟子出入無時莫知其鄉合而觀之  
便見奇特無攖者無撓亂攖拂之也排下者不  
得志之時愈見頽塌得志之時則好進不已上  
此心向上也下心趨下也向上向下皆爲囚殺

乃自累自苦之意綽約儼羨也剛強之人或爲  
綽約所柔以項羽而泣涕於虞羨人是也廉剗  
圭角也彫琢磨礲也諺云入太學者羨角入去  
雞頭出來即此意也少年得志之人多少圭角  
更涉憂患世故皆消磨了故曰廉剗彫琢其內  
熟時如樵火然其凜々時如凝冰然此皆形容  
人心燥怒憂愁之時一俯仰之間而其中心往  
來如再臨四海之外其急疾也如此撫臨撫也  
猶言行一過也其居也淵而靜言心不動之時  
其動也縣而天言此念一起之時如縣係於天

憤與憤同憤驕亢戾之狀不可係即不可制也  
佛經云如何降伏其心看他降伏字便見得憤  
驕不可係之意此一段模寫人心最為奇妙非  
莊子之筆亦未易能也

昔者黃帝始以仁義擾人之心堯舜於是乎股無  
肢脛無毛以養天下之形愁其五臟以爲仁義矜  
其血氣以規法度然猶有不勝也堯於是放讐塊  
於崇山投三苗於三峗流共工於幽都此不勝天  
下也夫施及三王而天下大駭矣下有桀跖上有  
曾史而儒墨畢起於是乎喜怒相疑愚智相欺善

否相非誕信相譏而天下衰矣大德不同而性命  
爛熳矣天下好智而百姓求竭矣

股無肢猶髀肉不生之意脛無毛言勞其足也  
矜音勤與禪同矛柄也項籍傳鋤耰棘矜此言  
矜捷其血氣也猶曰柴其內也規爲也言其爲  
仁義法度勞苦如此雖如此勞苦而猶有無奈  
何處故有放流之形不勝天下者言其無如天  
下何也四罪而天下咸服本舜事也而莊子喚  
作堯所以曰其辭雖參差而詭詭可觀見天下  
篇此便是參差處是實供吐了堯舜且如此延

及三王尤大可駭矣施延也三王既如此所以  
下而小人則爲桀跖之行上而君子則慕曾史  
之名而起儒墨之爭於是自喜於我而加怒於  
人自以爲智而以人爲愚自以爲善而以人爲  
否自以爲信而以人爲誕彼此皆然故有相疑  
相欺相非相譏之事即齊物篇中彼亦一是非  
此亦一是非之意爛熳字下得好性命之理到  
此都狼籍了求竭者言下無以應之也

於是乎斬鋸制奪繩墨殺焉椎鑿決焉天下脊々  
六亂罪在攖人心故賢者伏處太山嵁岩之下而

萬乘之君憂慄乎廟堂之上今世誅死者相枕也  
桁楊者相推也刑戮者相望也而儒墨乃始離跂  
攘臂乎桎梏之間噫甚矣哉其無愧而不知耻也  
甚矣吾未知聖知之不爲桁楊接摺也仁義之不  
爲桎梏鑿柄也焉知曾史之不爲桀跖嚆矢也故  
曰絕聖棄智而天下大治

此段言其不勝天下遂至於用刑斬鋸繩墨椎  
鑿皆用刑之具也繩束縛者也墨黥涅也脊々  
者猶籍々也罪在攖人心者言自黃帝始也賢  
者隱遁不出而其君自勞天下被罪者甚衆氣

象如許而儒墨於此時猶且高自標置於舉世  
罪人之中故曰乃始離跂攘臂乎桎梏之間離  
跂支離翹跂也攘臂奮乎言談也乃自許自高  
之兒意嘆也甚矣哉言所為已甚也儒墨於此  
可謂甚不知耻也上下兩甚矣字意都不同皆  
是奇筆處桁楊械也相推言行者相揆櫟也桁  
楊接楣因聖智而有桎梏鑿柄因仁義而有桀  
跖借魯史之說得以自文而爲害是曾史爲盜  
跖之嚆矢也接楣今枷中橫木亦楔也嚆矢也  
今之響箭也

黃帝立爲天子十九年令行天下聞廣成子在於  
崆峒之上故往見之曰我聞吾子達於至道敢問  
至道之精吾欲取天地之精以佐五穀以養民人  
吾又欲官陰陽以遂群生爲之奈何廣成子曰而  
所欲問者物之質也而所欲官者物之發也自而  
治天下雲氣不待族而雨草木不待黃而落寅一作公  
日月之光益以荒矣而佞人之心翦一者而一又  
奚足以語至道

取天地之精以佐五穀是致和而使萬物育也  
官陰陽以遂群生是燮調陰陽以順萬物也官

卷之四  
各任其職也陰陽不相戾各當其職曰官物之本然者曰質即前言至道也物之殘者言害物之事也天地陰陽皆自然之理五穀群生亦自生自遂之物有心以官之則反為物之害矣而汝也指黃帝而言也族聚也雲不族而有雨是此有而彼無也不待黃而落失時也荒者日月有薄蝕廢其光也荒廢也翦々猶淺々也

黃帝退指天下築特室席白茅間居三月復往邀之廣成子南首而卧黃帝順下風膝行而進再拜稽首而問曰聞吾子達於至道敢問治身奈何而

可以長久廣成子蹶然而起曰善哉問乎來吾語汝至道至道之精窈々冥々至道之極昏々默々無視無聽抱神以靜形將自正神必靜必清無勞汝形無搖汝精乃可以長生目無所見耳無所聞必無所知汝神將守形乃長生

不曰治天下而曰治身故以爲善問窈々冥々遠而不可窮也昏々默々微而不可見也無視無聽耳目俱忘也神存於心曰抱靜而無爲形則自正神必清靜形不勞役氣無搖動則可以長生今修煉之學皆原於此如仙如佛自古以

來必皆有之亦不是莊子方爲此說也無勞無  
搖此無字與勿字同有禁止之意目無見耳無  
聞心無知又解無視無聽抱神以靜兩句神守  
其形則可以長生此神字今修養家所謂嬰兒  
是也

慎汝內閉汝外多智爲敗我爲汝遂於大明之上  
矣至彼至陽之原也爲汝入於窈冥之門矣至彼  
至陰之原也天地有官陰陽有藏慎守汝身物將  
自壯我守其一以處其和故我修身千二百歲矣

吾形未嘗<sub>常</sub>襄

慎汝內不動其心也閉汝外不使外物得以動  
吾心也纔多智則爲累矣不識不知而後德全  
故曰多智爲敗至陽之初大明也至陰之初窈  
冥也原初也大明之上太虛之上也窈冥之門  
無極之始也易言一陰一陽之謂道亦是此等  
說話但其說涵畜莊子要說得暢快故其辭如  
此爲汝者教汝也遂從也猶往也入窮也言欲  
教汝極至於此也官職藏府也此言人身自有  
天地陰陽也我之天地各宮其官我之陰陽各  
居其所則此身可以慎守物々皆自堅固物者

我身所有之物也故曰物將自壯所守者一而不雜所處者無不和順此所以形雖千二百歲之久而不衰也處者處事處物也感而應之者也天地即吾身之健順也

黃帝再拜稽首曰廣成子之謂天矣廣成子曰來余語汝彼其物無窮而人皆以爲終彼其物無測而人皆以爲極得吾道者上爲皇而下爲王失其道者上見光而下爲土今夫百昌皆生於土而反於土故余將去汝入無窮之門以遊無極之野吾與日月參光吾與天地爲常當我繙乎遠我昏乎

人其盡死而我獨存乎

廣成子之謂天者言其可與天合一也物安有窮而人必求其所終物豈可測而人必求其所極是以有涯而隨無涯也此兩句極有味以龐言之則打鐵作門限鬼見捐手喚亦此意易不終於既濟而終於未濟是知物無窮而物無測也子在川上而曰逝者如斯乎亦指其無窮無測者言之上可以爲皇下可以爲王此皇王字如聖盡倫王盡制如天下篇所謂內聖外王也皇是無爲者也王是有爲者也非三皇與三代

之王也上見光者日月也下爲土者地也言居  
天地之間曠然無知舉頭但見日月低頭但見  
地下而已百昌百物也生於土而反於土葉落  
歸根臭腐化神奇神奇化臭腐之意去汝者離  
去人間之意無窮之門無極之野猶言天地之  
外也可與日月天地相爲長久故曰與日月參  
光與天地爲常縉與冥同昏昧也當我者迎我  
而來也遠我者背我而去也物之來去我皆泯  
然而不知故曰當我者縉乎遠我者昏乎人盡  
死去以其心死而不知道也

雲將東遊過挾搖之枝而適遭鴻蒙鴻蒙方將拊  
脾爵躍而遊雲將見之偶然止贊然立曰叟何人  
耶叟何爲此鴻蒙拊脾爵躍不輟對雲將曰遊雲  
將曰朕願有問也鴻蒙仰而視雲將曰吁雲將曰  
天氣不和地氣鬱結六氣不調四時不節今我願  
合六氣之精以育群生爲之奈何鴻蒙拊脾爵躍  
掉頭曰吾弗知吾弗知雲將不得問又三年東遊  
過有宋之野而適遭鴻蒙雲將大喜行趨而進曰  
天忘朕耶天忘朕耶再拜稽首願問於鴻蒙々々  
曰浮遊不知所求猖狂不知所往遊者鞅掌以觀

無妄朕又何知雲將曰朕也自以爲猖狂而民隨予所往朕也不得已於民今則民之放也願聞一言鴻蒙曰亂天之經逆物之情玄天弗成解獸之群而鳥皆夜鳴災及草木禍及昆蟲意治人之過也扶搖之枝即扶桑日出之地也拊髀雀躍形容其跳躍自樂之意倘然自失之兒聳然屹立之貞叟指鴻蒙也趙州見投子買泊而歸州云久聞投子今見買油翁投子曰油乞看禪宗此事便見對雲將曰遊乃是莊子形容鼓舞處油字與遊字不同非以油爲遊也不輟而對曰遊仰

親曰吁畫得自妙育群生之間便與前黃帝之間同掉頭搖頭也天忘朕耶朕我也呼鴻蒙爲天言前日曾一見尚記得否豈已忘之耶浮遊周遊也猖狂軼蕩也不知所求無所求也不知所往無所往也鞅掌紛汨也無妄真也遊於舉世紛汨之中而自觀其眞不得已於民言欲謝絕之而不可也放效也民以我爲法也天之經常物之情實皆自然而已今既以有心爲之則是亂逆其自然矣豈得成自然之化故曰玄天弗成玄虛也猶言先天也獸群而不爭則無異

類同類之別今各解其群而去則是有余我同異也鳥皆夜鳴驚而不能輔物之自然而使失其性則草木昆蟲皆被禍矣此皆自有心以治人始亦猶前曰罪在擾人心也

雲將曰然則吾奈何鴻蒙曰意毒哉仙乎歸矣雲將曰吾遇天難願聞一言鴻蒙曰意心養沒徒處無爲而物自化隨尔形體吐尔聰明倫與物忘大同乎涇溟解心釋神莫然無魂萬物云々各復其根各復其根而不知渾沌終身不離若彼知之乃是離之無問其名無闕其情物固自生雲

將曰天降朕以德示朕以默躬身求之乃今也得再拜稽首起辭而行

然則吾奈何者言今既如此如之何而可也毒哉猶石頭所謂苦哉々々是也仙仙乎急去之自言汝已自毒自苦可急々歸去不必問我這一段粧撰問答處便似傳燈錄上說話心養者言止汝此心自養得便是不曰養心而曰心養當子細分別徒但也言汝但處於無爲之中而物自化自化者往來不息自生自化之意也將從前許多聰明皆吐去而莫留之倫與論同論

沒也泯沒而與物相忘則與淵溟大同矣淵溟無形無朕未有氣之始也解心解去其有心之心釋神釋去其有知之神莫然定也無魂者無知也○精曰魄神曰魂無魂者猶前言塊然以其形立也解心之心與心養之心自異解神之神與抱神以靜之神自異此等字又當子細體認云々衆多也各復其根生者必滅也雖滅而不滅滅者又生故曰各復其根而不知渾渾沌沌無知無覺之兒渾沌則終身不離乎道矣纔有知覺則與道爲二故曰若彼知之乃是離之

此一句其精微當著眼看凡有分別之謂名凡有好惡之謂情闕者見也無問無闕則無所分別無所好惡矣此即無爲自然也我能無爲自然則物々各遂其生是其固然者也故曰物固自生固者固有也降猶言賜我也默者不言也賜我以自然之德示我以不言之理反身而求之已得此道躬親也自也言自於吾身求之乃得其所得矣遂相謝而去

世俗之人皆喜人之同乎已而惡人之異於已也同於已而欲之異於已而不欲者以出乎衆爲心

也夫以出乎衆爲心者曷嘗出乎衆哉因衆以寧所聞不如衆技衆矣而欲爲人之國者此攬乎三王之利而不見其患者也此以人之國僥倖也幾何僥倖而不喪人之國乎其存人之國也無萬分之一而喪人之國也一不成而萬有餘喪矣悲夫吾土者之不知也

自此以下至篇末乃是莊子自鋪說一段欲人同已而不欲其異已是以前我皆出乎衆人之上也以已之所聞必欲衆人皆歸向而後安則我何嘗異乎衆人雖欲出衆而何由出衆若謂之

獨見則必衆人皆不知而後可既欲人之同我則是我不如衆人之技多矣老子曰知我希則我貴矣莊子又如此翻騰出韓退之論文所謂猶有人之說在亦是此意其心如此而欲爲人之國是欲攬取三王之利而不知其必爲害患也以此謀人之國是圖僥倖也僥倖爲心但見有喪安得有成但有國者未知其人而爲其所感也有土者有國也指當時諸侯而言也此意分明是譏當時歷聘遊說之士

夫有土者有大物也有大物者不可以物物而不

物故能物之。明夫物之者之非物也。豈獨治天下百姓而已哉。出入六合。遊乎九州。獨往獨來是謂獨有。之。是之謂至貴。

物之者有心有迹也。不物者無爲而爲自然而然也。無爲則無所不爲。故曰不物故能物之。若知物之不物。則豈特治天下而已。故曰出入六合。遊乎九州。言道超乎萬物之表也。操縱闔關於造化之間。而與天爲一。非人可得而二之。故曰獨往獨來。是謂獨有。如此則至貴矣。

大人之教。若形之於影聲之於嚮。有問而應之。盡昔之君子。覩無者。天地之友。

其所懷爲天下配。處乎無響。行乎無方。挈汝適復之撓。以遊無端。出入無旁。與日無始。頌論形軀。合乎大同。之。而無已。之。惡乎得有。之。覩有者。昔之君子。覩無者。天地之友。

大人至人也。即獨有之人也。形必有影聲必有響。自然而然也有。問於我。則盡吾之所懷而應之。以此對乎天下。是以一身而獨當天下之大也。我爲主配。爲賓無響。無聲無臭。也無方無迹也。撓。群動不已。之。見適往也。挈提也。沒指舉世之人也。復歸也。挈舉世之人而往歸之於撓。

撓之中言雖出世而不外於世間者是出世  
間非二法也無端無始也無旁四面皆無極也  
出入而遊乎其間日夕如是而不見其所終安  
知其所始故曰與日無始以形軀而論贊之合  
乎天地之間皆同此身也故曰合乎大同頌贊  
也我身既與萬物皆同則不得而自私是無已  
矣既已無已則何者爲有即龐居士所謂空諸  
所有勿實諸所無也昔之君子但見其有與天  
下爲友者方見其無其曰昔之君子者自堯舜  
而下皆在其中

賤而不可不任者物也卑而不可不因者民也匿  
而不可不爲者事也庶而不可不陳者法也遠而  
鹿鹿  
不可不居者義也親而不可不廣者仁也節而不  
可不積者禮也中而不可不高者德也一而不可  
不易者道也神而不可不爲者天也

觀此一段莊子依舊是理會事底人非止談說  
虛無而已伊川言釋氏有上達而無下學此語  
極好但如此數語中又有近於下學處又有精  
粗不相離之意以道爲貴則物爲賤矣人豈能  
遺物哉故曰賤而不可不任者物也任用也以

道爲貴則在人者卑矣然豈能離人而獨立哉故曰卑而不可不因者民也因相依也匿隱也晦昧也明白者道也以事對道事則晦昧矣然豈能盡遺世事哉故曰匿而不可不爲者事也道者精也法者粗也法豈能盡棄哉故曰龐而不可不陳者法也言義則去道遠矣而義豈可去哉故曰遠而不可不居者義也道無親疎仁則有愛雖非至道而豈能遺仁哉必推廣之故曰親而不可不廣者仁也禮節文似於強世而不可不爲有故曰節而不可不積者禮也禮儀

三百威儀三千豈一日一人之力可爲故曰積德人所同得也雖與世和同而有當自立處豈得與人同故曰中而不可不高者德也中和同也一於自然者道也然而有當變易處豈容執一而不變故曰一而不可不易者道也不可知之謂神天之所爲皆不可知人事不可以不盡豈可盡委之不可知哉故曰神而不可不爲者天也

故聖人觀於天而不助成於德而不累出於道而不謀會於仁而不恃薄於義而不積應於禮而不

諱接於事而不讓齊於法而不亂恃於民而不輕  
因於物而不去物者莫足爲也而不可不爲不明  
於天者不純於德不通於道者無自而可不明於  
道者悲夫

不助者不容力也在於人者不容不爲而以道  
眼觀之則雖爲之而不容力故曰觀於天而不  
助此助字與助長字同不累者不累積以高也  
累積以爲高則是容心不自然矣累音壘不謀  
者無計度之心也不恃者不自以爲恩也會聚  
也積不化也不積則化矣薄逼也近也所行雖

近義而不自以爲有曰集義則不化矣不諱者  
不拘忌也應之接也拘於禮文則有所諱避可  
行則行隨事而應接之故曰應於禮而不諱讓  
退縮之意也接事之間直情經行無所退縮故  
曰接於事而不讓以法齊物雖紛雜之中而有  
簡直之意故曰不亂民雖可恃而不輕我以倚  
重之物雖可因而不去本以就末幹轉從上數  
句到此已盡却又提起一物字曰物莫足爲也  
而不可不爲此物字即是精者爲道粗者爲物  
事々物々皆在其中矣若以道心觀之皆不足

爲然而有不可以不爲此便是人心處觀此一句則莊子豈不知精粗爲一之理者又曰不明於天者不純於德言世間之事雖不可不爲而必知自然之理則可不明於天理之自然則在我之德不純一矣不通於道即不明於天也無自而可者言無往而不窒礙也上言不明於天不通於道到此結處又曰不明於道則知不明於天不通於道兩句只是一意

何謂道有天道有人道無爲而貴者天道也有爲而累者人道也主者天道也臣者人道也天道之

與人道也相去遠矣不可不察也

此两行最妙最親切於學問但讀者忽而不深求之無爲而尊者天道之自然也有爲而累者人道之不容不爲者也上句便屬道心下句便屬人心此一累字便與危字相近主者天道是以道心爲主也臣者人道是便人心聽命也此臣主字不是朝廷君臣從來讀者只作君臣說誤矣此是一身中之君臣齊物論曰其邈相爲君臣乎其有真君存焉當如此看可也莊子之書大抵貴無爲而賤有爲前兩轉既說有爲者

不可不爲又恐人把有爲無爲作一例看故於此又曰天道與人道相去遠矣不可不察也開闔抑揚前後照應若者得出自是活撥之地但其言語錯雜鼓舞變化故人有不能盡知之者兼其間如遠而不可不居者義親而不可不廣者仁此語不入聖賢條貫所以流於異端須莫作語孟讀方可自賤而不可不任以下至不可不察也此莊子中大綱領處與天下篇同東坡以爲莊子未嘗譏孔子於天下篇得之今曰莊子未嘗不知精粗本末爲一之理於此篇得之

更有一說聖賢之言萬世無弊諸子百家亦有說得痛快處且如易曰形而上者謂之道形而下者謂之器化而裁之謂之變推而行之謂之道舉而措之天下之民謂之事業又曰見乃謂之像形乃謂之器制而用之謂之法利用出入民咸用之謂之神何嘗不說精底何嘗不說粗底說得如此渾成便自無弊樂軒曰儒者悟道則其心愈細禪家悟道則其心愈粗此看得儒釋骨髓出前此所未有也如莊子此段把許多世間事喚做卑喚做粗中間又著箇不可不三

字似此手腳便龐了便無惟精惟一允執厥中  
氣像若分別得這龐細氣像出方知樂軒是悟  
道來是具大眼目者他人闡佛只說得皮毛他  
既名作出世法又以絕人類去倫紀之說闡之  
何由得他服

莊子外篇在宥第十一

莊子外篇天地第十二

天地雖大其化均也萬物雖多其治一也人卒雖  
衆其主君也君原於德而成於天故曰玄古之君  
天下無爲也天德而已矣

其化均者言皆是元氣也治主也萬物雖多主  
之者一造化而已人卒雖衆其主君也猶言天  
無二日民無二王也天之與我者爲德我能推  
原其德之初皆自天而成之則人力無所加矣  
爲人君者能知乎此則無爲而順自然矣無爲  
自然便是天德玄遠也玄古猶邃古也

以道觀言而天下之君定以道觀分而君臣之義明以道觀能而天下之官治以道汎觀而萬物之應備故通於天地者德也行於萬物者道也上治人者事也能有所藝者技也技兼於事而兼於義義兼於德德兼於道道兼於天

天地之間有氣則有聲有聲而後有名名之爲君則天下之分定矣此自天地之初纔有聲時便自定了此是自然底故曰以道觀言而天下之君定言聲也道自然也旣有此分則自有君臣之義便是卑高以陳貴賤位矣之意故曰以

道觀分而君臣之義明天下之事非一人所能用於世者多隨其能而盡其職其所以能者亦天與之蓋天生許多人出而做許多事故曰以道觀能而天下之官治萬物之間未有無對者有寒則有熱有雌則有雄有上則有下有前者則有後有左則有右箇々相應皆出自然故曰以道汎觀而萬物之應備此四句最妙其語甚純粹天能覆能生地能載能成同此德也通同也萬物之間各有自然之理行乎其中故曰行於萬物者道也上之所以治者如禮樂刑政皆

治之事也事々之中各有藝業隨其所能者人之技也道德精者也事與技粗者也無精無粗皆出於自然則技即事事即藝々即德々即道道即天故曰技兼於事々兼於義々兼於德々兼於道道兼於天兼者合二爲一之意義合作藝因聲同故傳寫之訛耳

故曰古之畜天下者無欲而天下足無爲而萬物化淵靜而百姓定記曰通於一而萬事畢無心得而鬼神伏

畜天下即孟子所謂以善養天下者我無欲則

天下自然足我無爲則天下自然化我能靜則百姓自然定淵靜澄靜也萬事不過一理故曰通一而萬事畢得於我者苟能無心則非特人伏之鬼神亦伏之記曰猶傳有之也此語上世所傳故莊子舉以自證此五句極純粹上三句與老子略同

夫子曰夫道覆載萬物者也洋洋乎大哉故君子不可以不刳心焉無爲々之々謂天無爲言之之謂德愛人利物之謂仁不同々之之謂大行不崖異之謂寬有萬不同之謂富故執德之謂紀德成

之謂立循於道之謂備不以物挫志之謂完君子明於此十者則韜乎其事心之大也沛乎其爲萬物逝也

夫子言其師也剗心者剔去其知覺之心也去此知覺之心而後可以學道天自然也爲之以自然則謂之天得於己者不言喻故曰無爲言之也謂德無爲言者謂無所容言也異者亦同故曰不同也之如此大矣崖異有迹也寬綽然也物也不同而我皆有之故曰有萬不同之謂富即萬物皆備於我也紀條理也所執之德小

大有序各有條理故曰執德謂之紀卓乎如有所立德之成也循其道而行則無所不備備道全美也完全也外物不足以動其心則在我者全矣故曰不以物挫志之謂完十者天德仁大寬富紀立備完也韜藏也包括萬事而無遺皆歸於心此心之大無外矣故曰韜乎其事心之大也逝者往也逝者如斯之逝也萬物往來不窮而吾與之爲無窮故曰沛乎其爲萬物逝也若然者藏金於山藏珠於淵不利貨財不近貴富不樂壽不哀夭不榮通不醜窮不抱一世之利以

爲己私分不以王天下爲己處顯顯則明萬物一  
府死生同狀

藏金於山巖珠於淵窟藏於天下也不近者遠  
之也不以壽夭爲哀樂不以窮通爲榮辱醜字  
下得便勝辱字一世之利與一世共之不抱以  
爲我之私分人亡兮人得之亡意也雖王天下  
不自以爲尊顯黃屋非堯心之意也胷中之明  
照乎天地以此爲顯故不以王天下爲顯也聚  
萬物而歸之一理故曰一府死生亦大矣而無  
所變於已視之若一也故曰同狀

夫子曰夫道淵乎其居也謬乎其清也金石不得  
無以鳴故金石有聲不考不鳴萬物孰能定之  
淵乎其居靜也居者不動也定也謬乎其清不  
混不雜也金石之鳴亦自然之天也故曰金石  
不得無以鳴言鳴底便是道也然金石雖有聲  
非人考之擊之則不鳴人之考擊亦是天機也  
此兩句又是一般道理乎猶前所謂庸詎知吾  
所謂天者非人乎所謂人者非天乎故曰萬物  
孰能定之天非人不因人非天不成亦是此意  
但於此書文字說得奇耳

卷四  
三十一  
夫王德之人。素逝而耻通於事。立之本原。而智通於神。故其德廣。其心之出。有物採之。故形非道不生。生非德不明。存形窮生。立德明道。非王德者邪。蕩々乎忽然出。勃然動。而萬物從之乎。此謂王德之人。

王德者言有王天下之德也。素逝者以素朴而往。猶易言素覆往也。事々無不爲無不能而不以此爲名。故曰耻通於事。本原萬物之初也。智通於神。至誠如神也。採取也。物有取於我而後其心應之。故曰其心之出。有物採之。採猶咸也。

出猶應也。萬物皆造化之所生。凡有形者皆同此道也。然非自得於我。則此道不明。言不知也。下句生字言我受天地之中以生也。存我之形以窮究其姓。生之理立我之德以明其自然之道。此非聖人不能也。蕩々乎言其大也。忽然出首出庶物之出也。勃然動不得已而起之意也。萬物從之是聖人作而萬物覩也。

視乎冥々。聽乎無聲。冥々之中。獨見曉焉。無聲之中。獨聞和焉。故深之又深。而能物焉。神之又神。而能精焉。故其與萬物接也。至無而供其求。時騁而

要其宿大小長短脩遠

冥々無形之地也。視於無形而其見曉然即恍  
兮惚兮其中有像也。人皆以爲無聲而我之所  
獨聞如八音之相和所謂非見彼也自見而已  
矣。非聞彼也自聞而已矣。深之又深入玄入妙  
也。而又能應乎物言能精能粗也。神無形也精  
氣也。以無形而見之有氣形上形下之意也。存  
於我者虛而應於物也。無已是以至無而供萬  
物之求也。時騁時出而用也要其所歸宿不可  
以一定言。或小或大或長或短或遠或近便是

時中之意脩遠合作遠近其意方足。今曰脩遠  
脩即長也。分明是箇近字意或是上面既曰小  
大長短此言脩遠則近亦在其間不然則是筆  
快失檢點處。但此兩三段散語文字精甚。他人  
如何有此筆法

黃帝遊乎赤水之北。登乎崑崙之丘。而南望還歸。  
遺其玄珠。使智索之而不得。使離朱索之而不得。  
使喫詣索之而不得也。乃使象罔索之得之。黃帝  
曰。異哉。象罔乃可以得之乎。

此段言求道不在於聰明不在於言語即佛經

所謂以有思惟心求大圓覺如以螢火燒須於山却粧出一段說話如此玄珠道也知之覺也離朱明也喫詬言辯也衆罔無心也知覺聰明言辯皆不可以得道必無心而後得之此等譬喻也自奇絕

堯之師曰許由許由之師曰齧缺齧缺之師曰王倪王倪之師曰被衣堯問於許由曰齧缺可以配天乎吾籍王倪以要之許由曰殆哉圾乎天下齧缺之爲人也聰明叡智給數以斂其性過人而又乃以人受天彼審乎禁過而不知過之所由生與

之配天乎彼且乘人而無天方且本身而異形方且尊智而火馳方且爲繙使方且爲物駭方且囚顧而物應方且應衆宜方且與物化而未始有恒夫何足以配天乎雖然有族有祖可以爲衆父而不可以爲衆父之治亂之率也北面之禍也南面之賊也

段是撰出愈出而愈奇若此一段謂外篇粗於內篇可乎配天猶書云殷禮陟配天也言王天下也要邀致之也坂危也殆亦危也聰明叡智性也幹捷也數急也敏見快也應事之間以

其性之敏故應之捷給此其過人處也脩人事  
以應天理故曰以人受天審明也禁過猶持心  
而未化也知過之由生則不待禁止之矣乘人  
而無天言盡其有爲而不知無爲也乘行也行  
其在人之事故曰乘人身我也以我對物故曰  
本身而異形火馳如火之馳言其急也自尊尚  
其知而急用之故曰尊知而火馳緒未也爲末  
事所役而不知其本故曰緒使叢脞之意也物  
絃爲事爲物所拘礙也物隨四方而來顧視而  
應之故曰四顧而物應事之而應合度其宜故

曰應衆宜爲物所汨而失其自然之常者非能  
定而應也故曰與物化而未始有垣化爲事物  
所變動也常一也未始有常無定也一箇破且  
七箇方且古今以來郡得這般文筆雖然又轉  
一轉言其雖未可以配天亦有可尊處一族之  
聚必尊其祖故曰有族有祖只此等間四字下  
得亦竒衆父者出於衆人而可以爲其父也謂  
其高一世也衆父之父則高又高矣衆父之父  
天也自然者也率將師也言此人之用於世亦  
可以致治亦可以致亂北面臣也南面君也言

以此爲臣道以此爲君道皆有患害故曰北面之禍也南面之賊也

堯觀乎華々封人曰嘻聖人請祝聖人使聖人壽堯曰辭使聖人富堯曰辭使聖人多男子堯曰辭封人曰壽富多男子人之所欲也汝獨不欲何邪堯曰多男子則多懼富則多事壽則多辱是三者非所以養德也故辭封人曰始也我以汝爲聖人邪今然君子也天生萬民必授之職多男子而授之職則何懼之有富而使人分之則何事之有富壽多男人之所欲也學道者則以爲不足介人也

意莊子却如此翻說越見他高處天生萬民必授之職即是孩兒隨地便有衣食分劑山谷所謂百草愁春雨是也富而使人分之言各付諸人也

夫聖人鶴居而穀食鳥行而無彰天下有道則與物皆昌天下無道則脩德就間千歲厭世去而上儻乘彼白雲至于帝鄉三患莫至身常無殃則何辱之有

鶴居無定所也穀鳥初生者也其母哺之雖食而非自求也言無心於食也鳥行飛也無彰無

迹也隨所寓而無戀著也與物皆昌者物與我各得其生也脩德就間邦無道則隱也厭世而上僊解脫之意也白雲帝鄉虛無之上也三患少壯老也楞嚴經恒河水之喻便是三患身常無殃自樂也上言壽富多男子下却倒說壽既在後其辭又多此亦文之機軸也

封人去之堯隨云曰請問封人曰退已

堯猶欲問而封人不知答但曰退已猶言你去休接輿趨而辟荷蓀丈人到則行矣伊川不得與同舟者言皆此機關也

堯治天下伯成子高立爲諸侯堯授舜々授禹伯成子高辭爲諸侯而畊禹往見之則畊在野禹趨就下風立而問焉曰昔堯治天下吾子立爲諸侯堯授舜々授予而吾子辭爲諸侯而耕敢問其故何也子高曰昔堯治天下不賞而民勸不罰而民畏今子賞罰而民不仁德自此衰刑自此立後此之亂自此始矣夫子闔行邪無落吾事悒々乎耕而不顧

此段又言世變愈下一節不如一節在禹時不如堯舜矣無落吾事者落廢也言吾不暇與汝

言恐廢吾耕事也。愧々低首而耕之狀。堯不賞不罰。今子嘗罰而民不仁。其意蓋言賞罰不如無亦如必也。使無訟之意。却借堯舜禹之名。以言之。

泰祖和有無。無有無名。一之所起。有一而未形。物得以生謂之德。未形者有分。且然無間謂之命。留動而生物。物成生理謂之形。形體保神。各有儀則。謂之慈。性脩反德。德至同於初。同乃虛。々乃大。合喙鳴。々々合。與天地爲合。其合縕々。若愚若昏。是謂玄德。同乎大順。

泰初造化之始也。所有者只是無而已。未有个有字。也有猶無之。則安得有名。此乃一之所以起也。此一字便是無字。故曰有一而未形。物得以生。則有々矣。凡物各有其有。皆德也。未形者。言一所起之時也。若有分矣。而又分他。不得。故曰。且然無間。且然猶且也。且字下常添一字。無間。便是渾然者。有分。便是聚然者。此命字。即天命。謂性之命。留動而生物。元氣之動運而已。生而爲物。則是其動者。留於此。故曰留動而生。物留動二字。下得極精微。莫艸草看動陽也。留

動靜也靜爲陰此句便是有陽生陰成之意物得之而生既成物矣則生々之理皆具以元氣之動者而爲我之生者此謂之形也看佗形字却如此說實他書所無形體保神各有儀則謂之性此一句便是詩有物有則便是左傳所謂民受天地之中以生有動作威儀之則也形體氣也氣中有神所謂儀則皆此神爲之便是性中自有仁義禮智之意若以吾書論此四句第一句德字却是性字却是性之用矣所也道此書字義當作一眼看恙俗反德者言脩此性以

復其自然之德德旣至矣盡矣則與無物之初同矣反德猶言復禮也至極至也同於無物之初則虛矣虛則大矣旣虛而大則有不言之言合喙者不言也鳴者言也以不言之言如此下三字便是他奇筆處下面却翻一轉又曰喙鳴合此合字又與上合字不同矣言此喙之鳴旣以不言而言則與自然者合矣以此自然合則與天地合矣故曰喙鳴合與天地爲合縉々猶泯々也泯々然若愚若昏形容此合字也此乃謂之玄妙之德則與大順同矣大順即泰初自

然之理也

夫子問於老聃曰。有人治道若相放可不可。然不然。辯者有言曰。離堅白。若縣寓。若是則可謂聖人乎。老聃曰。是胥易技係。勞形怵心者也。執狸之狗成思。猿狙之便。自山林來丘。予告若而所不能聞。與而所不能言。凡有首有趾。無心無耳者衆。有形者與無形無狀而皆存者盡無。其動止也。其死生也。其廢起也。此又非其所以也有。治在人忘乎物。忘乎天。其名爲忘也。忘已之人。是之謂入於天。若相放帝王同條共貫之意以我之可明彼之。

不可以我之然明彼之不然。辯者之言雖曰堅白。同異紛々。多端。我能分辯之。若懸於天宇之間。謂能曉然揚而示人也。離分析也。胥易技係解。已見前篇成思者。爲人所繫縛而成其愁思也。自山林來者。言爲人捕而來也。前曰執黎。此曰執狸。黎此曰執狸。黎字誤也。所不能聞。所不能言。即性與天道。不可得聞之意。有首有趾。言人之頑。踵同也。無心無耳。言其無知無見也。無形無狀。自然而然者。於形而下者見形而上者。即有形者與無形無狀而皆存也。此一句下得

亦奇盡無者言世無此人也動止起居也廢起窮達也言起居死生窮達之間皆有自然而然者人皆知動止死生廢起之爲動止死生廢起而不知其所以爲動止死生廢起者也退之送文暢序曰江河所以流人物所以蕃亦有所見之言但今人等閑讀過了治者治事之治也人事者人事也因人事而治之則我無容心故曰有治在人非惟忘物併與天亦忘之此謂之忘已忘己者無我也入於天者入於自然也猶前曰入於非人也上曰忘乎天此曰入於天入則

與天爲一矣性其忘而後能爲一也但應帝王曰未始出於非人未能忘乎天也未始入於非人出乎造化之上也與此入乎天之語又異此皆其鼓舞處不可執著執著則難讀莊子矣將閭蒐見季徹曰魯君謂蒐也曰請受教辭不獲禽旣已告矣未知中否請嘗薦之吾謂魯君曰必服恭儉拔出公忠之獨而無阿私民孰敢不輯季徹局乍然笑曰若夫子之言於帝王之德猶螳螂之怒臂以當車軼則必不勝任矣且若是則其自爲處危其觀臺多物將往投迹者衆將閭蒐覩之

然驚曰。憲也。沈若於夫子之所言矣。雖然願先生之言其風也。

薦陳也請以所言陳之。援出公忠之屬舉賢也無阿私無偏黨也。輯安也。局局笑之貌也。螳螂怒其臂以當車轍。言力小不足以任此大事也。曰怒而飛曰草木怒生此言怒臂莊子喜下一個怒字其自爲處者言其自爲所處之地如此則似危其觀臺以示於人人將往而歸之則投足而來者愈衆矣。多物人物之多也。意言名聲愈盛而世之趨者愈衆則自累矣。覩々驚之貌

聞此言而無所知故曰沈若於夫子所言風者遺風之風亦猶曰言其略也。

季徹曰。大聖之治天下也。搖蕩民心使之成教易俗舉滅其賊心而皆進其獨志。若性之自爲而民不知其所由然。若然者豈兄堯舜之教民溟涬然第之哉。欲同乎德而心居矣。

搖蕩者轉移也。賊心有爲之心也。獨志獨得之志。朝徹見獨之獨也。民既成教而易其習俗皆滅去私心而進於道。但如生知之恙自有而不知爲上之化故曰不知其所由矣。以堯舜爲高

而以我次之故曰兄堯舜之教而弟之謂堯舜  
豈能勝我々不在堯舜之下却下句如此也是  
好奇溟涬有低頭甘心之意民字即是人字言  
凡人能如此則豈肯兄堯舜之教而自處其下  
也同乎自然之德則其心安矣居安也欲者聖  
人欲其民如此矣也

子貢南遊方楚反於晉適漢陰見一丈人方將爲  
圃畦鑿隧而入井抱甕而出灌搣搣然用力甚多  
而見功寡子貢曰有械於此一日浸百畦用力甚  
寡而見功多夫子不欲乎爲圃者仰而視之曰柰

何曰鑿木爲機後重前輕挈水若抽數如洪湯其  
名爲槔爲圃者忿然作色而笑曰吾聞之吾師有  
機械者必有機事有機事者必有機心機心存於  
胷中則純白不備純白不備則神生不定神生不  
定者道之所不載也吾非不知羞而不爲也子貢  
瞞然慙俯而不對有間爲圃者曰子奚爲者邪曰  
孔丘之徒也爲圃者曰子非夫博學以擬聖於于  
以蓋衆獨弦哀歌以賣名聲於天下者乎汝方將  
忘汝神氣鹽汝形體而庶幾乎而身之不能治而  
何暇治天下乎子往矣無乏吾事

畦間鑿隧爲水溝也抽扱也泆湯洋溢而湧出也言取水之易也此數句形容得桔槔自好機械器也用之則爲機事所以用之者心也有機心則純白不備言不純一虛明也神生不定不能抱靜主一也道所不載言不能載道也要求學問工夫這般處皆當子細體認子奚爲者猶論語曰奚自也擬聖言慕聖人也於子自大之貌獨弦哀歌言人不已知而自誦自說賣名沽名也獨弦哀歌譬喻說也比之擊磬於衛則非矣忘汝神氣猶曰黜其聰明也隨汝形體即忘

已也汝能如此猶尚庶幾不然身且不治何能治人此譏吾聖人之言無乏即無落也

子貢卑陬失色頃之然不自得行三十里而後愈其弟子曰向之人何爲者邪夫子何故見之變容失色終日不自反邪曰始吾以爲天下一人耳不知復有夫人也吾聞之夫子事求可功求成用力少見功多者聖人之道今徒不然執道者德全德全者形全形全者神全神全者聖人之道也託生與民並行而不知其所之汎乎淳備哉功利機巧必忘夫人之心

卑陬慙惡之貌頃々自失之貌不自反言不復其常也天下一人言孔夫子也事求可可爲則爲也力少而功多便是桔槔之類徒獨也今其人獨不然言漢陰丈人也詫其生於世雖所行亦與人同自不知其所往即浮游而不知所求猖狂不知所往也故曰託生與民並行而不知其所之淳備純一渾金汎乎無形迹之貌功利機巧必忘夫人之心言此人心中心無功利機巧之事也此忘字與亡同無也

若夫人者非其志不之非其心不爲雖以天下譽

之得其所謂警然不顧以天下非之失其所謂儻然不受天下之非譽奢無益損焉是謂全德之人哉我之謂風波之民

夫人者指漢陰丈人也不以毀譽爲損益譽且不顧而况毀乎所言行於世曰得其所謂所言不行於世曰告其所謂風波言爲世故所役而不自定也

反於魯以告孔子孔子曰彼假脩渾沌氏之術者也識其一不知其二治其內而不治其外夫明白入素無爲復朴體性抱神以遊世俗之間者汝將

固驚邪。且渾沌氏之術。予與汝何足以識之哉。  
假大也。假脩大脩也。渾沌氏即天地之初也。術  
道也。識其一者所守純一也。不知其二者。言心  
不分也。內本心也。外亡物也。明白則可入素素  
者。素朴也。無爲則復歸於自然之朴體。悉全其  
性也。抱神一也。汝將固驚邪。固宜也。言汝未知  
此道。宜乎驚異也。

諱芒將東之大壑。適遇苑風於東海之濱。苑風曰。  
子將奚之。曰。將之大壑。曰。奚爲焉。曰。夫大壑之爲  
物也。注焉而不滿。酌焉而不竭。吾將遊焉。苑風曰。

夫子無意于橫目之民乎。願聞聖治。諱芒曰。聖治  
乎。官施而不告其宜。拔舉而不告其能。畢見其情  
事。而行其所爲行。言自爲而天下化。手撓顧指。四  
方之民。莫不俱至此之謂聖治。

大壑大海也。橫目之民。撰出此等字以形容其  
人也。遊於大壑者。言世間不足觀。將觀於海也。  
官施不告其宜。隨所職而各當其任也。拔舉而  
不失其能。無遺才也。情事實事也。盡見事。不可  
爲之實順。其所可爲者而行之。故曰。畢見其情  
事。而行其所爲。所行所言。皆是自爲。不爲人而

爲也天下自然化之自爲者爲已非爲人也手撓々動也言舉其手隨所顧而指之民莫不應書曰惟動不應後志是也手撓顧指々麾拱揖之意聖人之治天下如此意謂古帝王也

願聞德人曰德人者居無思行無慮不藏是非美惡四海之內共利之之爲悅共給之々爲安昭又條乎若嬰兒之失其母也儻乎若行而失其道也財用有餘而不知其所自來飲食取足而不知其所從此謂德人之客

居行動靜也動靜無所容心故曰居無思行無

慮也不藏是非美惡佛家所謂不思善不思惡也共利共給與人全樂之意怊乎悵然之貌若嬰兒失母若行失道皆言其無意人世有不得已之意財用飲食皆致之不問言無心也德人比之聖治高一層矣

願聞神人曰上神乘光與形滅亡此謂照曠致命盡情天地樂而萬事銷亡萬物復情此之謂混冥上神言其神騰躍而上也出乎天地之外日月之光反在其下故曰乘光與形滅亡言雖有身似無身矣照曠者言六昭晰也致命極乎天命

也盡情者盡其性中之情也此情字與孟子乃若其情則可以爲善同以天地之道自樂而萬事無所累於我故曰天地樂而萬事銷亡復情復於實理也萬事皆復於實理則與我爲一矣混冥即混淪也即所謂渾沌氏也神人比之德人又高一層如此分別蓋謂古帝王之上更自有不可及者

門無鬼與赤張滿智觀於武王之師赤張滿智曰不及有虞氏乎故離此患也門無鬼曰天下均治而有虞氏治之邪其亂而後治之與赤張滿智曰

天下均治之爲願而何計以有虞氏爲有虞氏之藥瘍也禿而施髢病而求醫孝子操藥以脩慈父其色熑然聖人羞之

滿稽之言以征伐不及於揖遜因無鬼之間又併與有虞氏非之言天下皆願於治因有虞氏治之而反以爲累也無瘍何以藥不禿何用髢不病何用醫蓋言喚作治天下便是病了無爲而治則無病也孝子爲父操藥其色終是不樂不若父之無病也故聖人以爲有心於治天下則可愧矣其言雖不正譬喻處亦奇特脩進也

與羞同古字通用羞之羞耻也

鹿

至德之世不尚賢不使能上如標枝民如野庶端正而不知以爲義相愛而不知以爲仁實而不知以爲忠當而不知以爲信蠹蓬而相使不以爲賜是故行而無跡事而無傳

舉世淳一未有賢能之名故曰不尚賢不使能標枝枯枝也但見其枝不見其葉故曰標枝野庶標枝皆是無情無欲之喻端正脩身也相愛相親也相與以實誠也由心之謂忠當事乞得其當也端正而下四不知言當時未有仁義忠

信之名也蠹動有生之民也相使相友助也不以爲賜者不以爲恩也行而無跡事而無傳是當時未有是非毀譽之事也此皆形容太古之世

孝子不諛其親忠臣不諛其君臣子之盛也親之所言而然所行而善則世俗謂之不肖子君之所言而然所行而善則世俗謂之不肖臣而未知此其必然邪世俗之所謂然而然之所謂善而善之不謂之導諛之人也然則俗故嚴於親而尊於君邪謂已導人則勃然作色謂已諛人則怫然作色

而終身導人也。終身諛人也。

不諛不諧能諫其君父也。隨其所言以爲然。隨其所行以爲善。不知諫者也在君親則以諫者爲是以不諫者爲非。而我之於世隨其所謂善者而善之。隨其所謂是者而是之。則世俗反嚴於君親乎。此意蓋言今人之所謂道皆世俗之所同是者。非獨得於已。而與造物爲徒者也。導順也。諛謔也。我之所謂道只與世俗同則是我之所爲亦導諛世俗而已矣。若人加以導諛之名。則我必不悅。而終身所爲不免導諛。言其不然。我必不悅。而終身所爲不免導諛。

能異於世俗也。聖人以天下通行者爲道。而莊子以爲道必出於一世之上。故以古之帝王與聖賢皆作下一等看。乃如此發明一段筆勢瀾翻信不可及。然其言亦太過矣。  
坐

合譬飾辭聚衆也。是終始本末不相埜。垂衣裳設絛色。動容貌。以媚一世。而不自謂導諛與夫人之爲徒。過是非。而不自謂衆人愚之至也。

合其譬者。言合天下譬喻以立說也。飾辭者。言脩飾其言辭也。聚衆者。言聚天下之學者而歸已也。觀其初心要高於一世。要其終也不能離

於當世之人是其終始本末不相照應矣故曰  
不相坐猶不相當也垂衣裳設綠色動容貌言  
儒者之衣冠也采色文章也循々以誘誨學者  
故以爲媚一世此皆譏吾聖人之意已之所是  
學於我者皆以爲是已之所非學於我者皆以  
爲非學於我者皆流俗之庸人也我之是非與  
彼通同則亦流俗之人矣既與庸人爲徒而不  
自謂爲庸人是至愚而無見者也莊子之意蓋  
以其所獨得者人皆不知故已與人異遂有此  
慎悞之言非正論也

知其愚者非大愚也知其惑者非大惑也大惑者  
終身不解大愚者終身不靈三人行而一人惑所  
適者猶可致也惑者少也二人惑則勞而不至惑  
者勝也而今也以天下惑予雖有祈嚮不可得也  
不亦悲乎大聲不入於里耳折揚皇華則嗟然而  
笑是故高言不止於衆人之心至言不出俗言勝  
也以二缶鐘惑而所適不得矣而今也以天下惑  
予雖有祈嚮其庸可得邪知其不可得也而強之  
又一惑也故莫若釋之而不推不推誰其比憂  
終身不解不靈只言其不自知也祈嚮趨嚮也

三人同行而二人皆惑猶且勞苦而行不至今  
天下皆惑於其說我雖獨有所趨嚮何以回一  
世哉此予字莊子自道也折揚皇華里巷之曲  
名也大聲古樂也喻其至高之論也不止於衆  
人之心者與之說不入也折揚皇華此比俗言  
也俗言勝則至言隱矣垂踵者垂其足而坐不  
肯行也二金踵惑者即前二言人惑也所適不  
得即前言勞不至也傳寫之誤以垂爲金以踵  
爲鐘皆不可解以前句證後句合作垂踵分明  
知其不可得而強之又一惑也此自歎之言謂

我旣知其不可告語而欲強以語之是我又添  
一惑也釋之舍去也不推不必推說也比近也  
付之不言則不近於憂矣此自解之言

厲之人夜半生其子遽取火而視之汲々然唯恐  
其似已也

厲人惡人也中間添一之字猶前言驪之姪也  
此是其文法也惡人生子恐其似已是自知其  
惡也彼且自知而世之惑者皆不自知則不如  
厲人矣以前面大惑終身不解大愚終身不靈  
又如此譬說兩句而不結斷此皆是弄筆處

百年之木破爲犧樽。青黃而文之。其斷在溝中。比犧樽於溝中之斷。則美惡有間矣。其於失性一也。跖與曾史行義有間矣。然其失惡均也。且夫失惡有五。一曰五色亂目。使目不明。二曰五聲亂耳。使耳不聰。三曰五臭薰鼻。困憊中顙。四曰五味濁口。使口厲爽。五曰趣舍滑心。使性飛揚。此五者皆生之害也。而楊墨乃始雖跂。自以爲得。非吾所謂得也。得者固可以爲得乎。則鳩鴟之在於籠也。亦可以爲得矣。

其斷在溝中者。破爲犧樽之餘者也。同此一木

或爲犧樽。或棄溝中。榮辱雖不同。必竟皆是枯木矣。此與藏穀亡羊處意同。五色五聲五臭五味。皆人力爲之。故以爲亂性。以此四者與趣舍並言。所以抑之也。困憊衝逆人也。中顙自臞而通於顙也。濁口汙其口也。厲爽乖失也。趣舍是非好惡也。以趣舍而汨亂其心。則自然之恙失矣。故曰趣舍滑心。使性飛揚。楊墨之學。趣舍滑心者也。而乃自以爲能。彼以其說自困而乃曰自得。以此爲自得。則禽獸在籠中。亦爲自得矣。貶之尤甚也。濁口一本作喝非。

且夫趣舍聲色以柴其內。皮弁鶡冠搢笏紳脩以約其外。內支盈於紫柵。外重纏繳。睂々然在纏繳之中。而自以爲得。則是罪人交臂歷指。而虎約在於囊檻。亦可以爲得矣。

以其趣舍形諸言語見諸顏色與人爭是非。脅次爲之梗礙。故曰趣舍聲色以柴其內。皮弁鶡冠搢笏紳脩是儒者之服也。衣服必以禮強自拘束。故曰以約其外。搢笏執也。紳脩長帶也。其在於內也。支塞充盈如柴柵然。言曾中不自在也。外爲禮文束縛如罪人被束縛然。纏繳繩縛

也。睂々目視之貌。人見其自苦如在束縛之中。而彼自以爲得。是罪囚之人與囊檻之虎。亦以爲自得乎。極口以詆揚墨亦已甚矣。交臂束其手也。歷指繩縛其手而指可數也。囊與檻並言。亦猶俗言胡孫入布袋也。

莊子外篇天地第十二

卷之四

莊子膚齋口義卷之四





